



Siore Rose e je vedue di un colonel dal esercit e e vîf intune citadine dal Friûl di mieç, intun grant apartament. E je sot dai otante, ma e sta ben sei di fisic che di sintiments. E à une femine a oris par tignî in ordin la cjase e pal mangjâ si rangje di bessole. Po ben, no mancjant di sostanze e plui pe companie che par altri, e decît di cjoli une badante. La agenzie i mande Ludmila, une siorute Rumene, cun tant di referencis e siore Rose, daspò vêle provade par une setemane, le cjape sù. Ludmila e je brave e volenterose e siore Rose e je contente di jê. Ogni dì, siore Rose e la badante a jessin di cjase tor undis, e a van a cjoli il caffè intal Cafè Grant, in place, juste sot dal sô apartament. Cuan che e jes, siore Rose e met sù dut il sô aur; golainis, anei, braçlets, spilis, rincjins, ma no par fâ viodi che e je siore, nome par ce che no si fide a lassâ a cjase chel capitâl, cun chês brutis musis che zirin ator.

Po ben,

Ludmila e je brave in cusine, soledut cun lis tortis e siore Rose che e je un tantin golose, lis fâs fâ dispès. Ven a stâi che sot lis fiestis di Nadâl, Ludmila i domande ae siore se pues lâ a passâ

lis fiestis cun la sô famee e siore Rose, di bon cûr, la lasse lâ. Il dì de partence Ludmila, alçade ni vore a buinore, e fâs dôs tortis, une pe siore e une par quartâ ai siei fîs, in Romanie. Siore Rose e à agrât par chest e vûl mangjâ subit une fete insieme a jê, che tant al è ancjemò timp par lâ a cjapâ la coriere. Ludmila, bielzà pronte par partî, no volarès, ma i tocje poiâ lis borsis e sentâsi. Siore Rose, taiant la torte, e sint dentri alc di dûr. Il prin pinsîr che i ven al è che i sedi colade une sidon intal impast a Ludmila, ma vierte la torte la sorprese: lis sôs golainis, i sôî braçalets, i sôî anei, i rincjins, insome dut il sô aur. Ludmila e ven blancje come un peçot e e tache a vaî, murmuant cualchi peraule di scuse e domandant perdon. Ce jerial sucedût?, Ludmila ingoloside di dut chel aur, e veve pensât ben di fâ il colp gobo; scuindi dut l'aur intune torte e tornâ in Romanie, par no fâsi plui viodi in Italie. Ma il diaul al fâs lis pignatis ma no i tapons; je e lasse fûr la torte sbaliade e cussì il malfat al ven subit a gale. Siore Rose, femine di caratar, no si lasse intenerî e e clame subit i carabinieri, che rivâts a puartin vie Ludmila.

Siore Rose, displasude di no crodi par la brute azion che Ludmila i à fat, e zure fra sê: “Badantis? Mai plui!”

di Pauli Jacuss